

Iluarsiissut

Matumuuna akissuteqaat 19-03-2019-imeersoq UPA2019/57 aamma saqqummiussissut 12-02-2019-imeersoq UPA2019/209 taarserneqarpoq

Uunga siunnersuut: Imigassaq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Tallimangornerup arfininngornerullu unnuaani kiisalu ullut freerfiusussat nallilerneranni ullaassakkut 05.00-p tungaanut imigassamik sassaaliisalernissaq anguniarlugu Imigassamut inatsimmi § 26-p allanngortinnissaanut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraatit)

Saqqummiussissut

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Naalakkersuisut sinnerlugit maanna Imigassaq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut saqqummiutissavara. Taassuma saniatigut siunnersuut nr. 57 sassaaliisarfinni ammasarfiit sivitsorneqarnissaanut ataqatigiissillugit oqaluuserineqassapput.

Imm. 209 pillugu

Aallaqqaasiutitut oqartussaasut, kommunit inuussutissarsiortullu Imigassaq pillugu Inatsisartut inatsisaata allanngortinneqarnera pillugu siunnersuummut tunngavilersuillutik oqaaseqarnerat pillugu qujaffigerusuppakka.

Imigassaq pillugu Inatsisartut inatsisaat atuuttoq 1. marts 2018-imi atuutilerpoq. Innuttaasut peqqinnissaat pillugu pilersaarut Inuuneritta II Naalakkersuisut akuersissutigisimasaat aallaavigalugu Inatsisartut inatsisaat suliarineqarpoq. Aaqqissuussaasumik pitsaalinuinnermut atatillugu Inuuneritta II-p siunertaa pitsaaliuinnermi aaqqiissutit pillugit aalajangersakkat iluaqutigalugit innuttaasut peqqissuunissaat pillugu pilersaarutip Inatsisartut inatsisaannut ilanngunneqarpoq, tamanna WHO-p kaammattuutai aallaavigalugit pivoq.

Inatsisartut 2018-imi ukiakkut ataatsimiinnermi aalajangiiffigisassatut siunnersuutit sisamat tassaasut oqaluuserisassani immikkoortut UKA 2018/52, UKA 2018/53, UKA 2018/54 kiisalu UKA 2018/55 akuersissutigaa. Taakku allannguutissatut siunnersuummi matumani ilanngunneqarput.

Allanguutit ilagaat sumiiffinni imigassamik sassaalliiffiusuni meeqqat inuusuttullu 18-it inorlugit ukiullit inersimasunik ingiaqateqarnatik isersimaarsinnaanerannik sivitsuineq. Piffissaq inatsimmi nal. 20.00-imut aalajangersarneqarpoq, maannali nal. 23.00-imut sivitsorneqarluni. Aalajangiiffigisassatut siunnersuut saqqummiunneqarpoq meeqqat inuusuttullu periarfissinniarlugit nal. 23.00 tungaanut inersimasumik ingiaqateqarnatik caféersinnaanissaat siunertaralugu.

Tamatuma saniatigut Inatsisartut aalajangiiffigisaat naapertorlugu innuttaasut imigassamik pisisinnaanissamut atatillugu annerusumik periarfissinniarlugit niuertarfiit imigassamik tuniniaanerannut piffissat sivitsorneqarput. Tuniniaanermi piffissat nutaat matuma kingorna tassaassapput ataasinngornermit arfininngornermut nal. 10.00-20.00.

Ussasaarinissamut inerteqquteqarneq kiisalu niuertarfiit imigassamik aalakoornartortalinnik assiaqusersuinissaannut piumasagaat aamma Inatsisartut aalajangigaat tunngavigalugit atorunnaarsinneqarput. Inerteqqut qasukkaanneqassasoq atorunnaarsinneqassasorluunniit aalajangiunneqarpoq. Tusarniaanermi internetikkut matoqqasumik ussasaarisogarsinnaalerneratigut qasukkaanneqassasoq siunniunneqarpoq. Taamaattoq tusarniaanermi akissutit pisorta qarfimmeersut avataaneersullu ersersippaat aqqissuussamik taamaattumik atuutsitsineq naleqqutinngitsaq. Taamaattumik ussasaareqqusinninginneq Inatsisartut aalajangiussaannut naapertuuttumik atorunnaarsinneqarpoq.

Kalaallit Nunaanni Politimesterip tusarniaanermi akissutaani tikkuarneqarpoq politiit naalakkiisinnaanermut periarfissaannut atatillugu inatsimmi atuuttumi naapertuuttoqannginnera. Naalakkiuteqartoqarpat imigassamik sassaallerfiusartut tamatuminna ilisimatinneqarsinnaasariaqarput. Taamattumik inuit kikkut sumiiffimmi pinerlussimaneq tunngavigalugu iseqqusaajunnaarsimasut pillugit sassaalliisarfiit piginnittuut paasissutissanik ingerlatitseqqiisinnaanermut tunngavissiortoqarpoq.

Imm. 57 pillugu

Naalakkersuisut Demokraatit inatsisartut aalajangiiffigisassaattut siunnersuutaannut sassaalliisarfiit ammasarfiisa ullaakkut tallimanut sivitsorneqarnissaannut saqqummiunneqartumut qujapput. Naalakkersuisut manna iluatsillugu oqaatigerusuppaat sammineqartumut inuiaqatigiinnullu annertuumik pingaaruteqartumut Inatsisartunut ilaasortat pimoorussillutillu soqutiginninnerat iluarisimaarmassuk. Taamaattumillu siunnersuuteqartoqarneratigut nangikkiartarnerit ikilisinneqarnissaat kissaatigineqarmat immikkut nuannaarutissaavoq.

Taamaakkaluortoq piffissat sassaalliisarfiit nal. 03.00-p tungaanut aalajangersarneqarnerat ajornartorsiutitaqarnerarlugu siunnersuuteqartup oqarnera Naalakkersuisunit isumaqatigineqanngilaq. Nangikkiartarnerit imigassamillu aalakoornartortalinnik anngiorluni tuniniaasarnerit ajornartorsiutaanerit siunnersuummi saqqummiunneqartumi

tunngavilersuutigineqarput. Imigassamik aalakoornartortalimmik anngiortumik tuniniaasarneq angerlarsimaffinnilu eqqissiviilliornerit inuiaqatigiinni ajornartorsiutaammata Naalakkersuisut isumaqatigaat aammalu ajornartorsiutit taakku aaqqiiviginiarlugit oqaloqatigiinnissamut piareersimallutik. Taamaattorli piffissat inatsisit naapertorlugit sassaalliisarfiit sivitsornerisigut ajornartorsiutit taakku aaqqiivigineqarsinnaanngitsut Naalakkersuisut isumaqarput.

Imigassaq pillugu Inatsisartut inatsisaat atuuttoq 1. marts 2018-imi atuutilerpoq. Tassunga atatillugu piffissat ammasarfiit pisariinnerusut assigiiaarnerusullu aammalu atuutsikkuminarnerusut Inatsisartut inatsisaata ilusilersorneqarnerani siunniunneqarput. Tamanna pingaartumik ulluinnarni nalliuttut nalaani ersarinnerusarpoq.

Naalakkersuisunit oqaatigineqassaaq inuit imertariaasiinut sassaalliisarfiit sivitsornerasigut pitsaasumik kinguneqarnissaanut ilisimasaqarluartunit tunngavilersorneqanngimmat. Tamatuma saniatigut nalorninarpoq sassaalliisarfiit sivitsornerasigut unioqqutitsilluni imigassamik aalakoornartortalimmik tuniniaaneq malunnartumik annikillisinnaasoq. Tassunga tunngatillugu nal. 05.00-ip tungaanut ammasarfinnik sivitsuinissaq siusinnerusukkut sassaallertarfinnit iluarisimaarneqanngitsoq Naalakkersuisunit maluginiarneqarpoq.

Taamaattumik Naalakkersuisut immikkoortoq 57 sassaalliisarfiit ammasarfiisa sivitsorneqarnissaat pillugu itigartitsissutigineqarnissaat inassutigissavaat.

Taama oqaaseqarlunga inatsisissatut siunnersuut aamma aalajangiiffigisassatut siunnersuut Inatsisartunik suliarineqartussanngorlugu tunniuppara.